

# PAILIMONE

## Poloyo Pailimoneke Wia Wetekane Pipia

<sup>1</sup> Polo nopa Keraisu Yesunole takama yakouke po yapu pitikagome uku.

Tone oyago Timosi totame tone oyago Pailimone neeke i agale wini oane wetekako-ye.

<sup>2</sup> Neke yapu losule toa oboai tiki yene ni tonono oya-toa Apia ni tota-pala poi kikutua tou toa Yesunole takama yako ago Akipasi kiwi peayake i agale wini oa wetekako-ye.

<sup>3</sup> Toneketai Akolali-pala Ali Muno Yesu Keraisu-tame kiwi peya pewe wia tepe koltoini kilikoa pikoa toamotoane kowitikoane uku-ye.

*Pailimone Ete Ali Atoake Wene Mekoa*

*Yesuke Wene Tugoa Mea Tanemo*

<sup>4</sup> Neke kowitikakene-kama Akolali-pala ke wane okala tuku. <sup>5</sup> Nipa Akolaline ali atoa peyake wene mekoa mea ni Ali Muno Yesuke wedoa wene tugoa mea toko wa neeke akedikimoke ke wane ni uku. <sup>6</sup> Neke Keraisuke wene tugoa meke tokomopa yete pade ali atoa eneke i i wa oa memotoane kowitikakala tuku. Toto Yesu-pala lipua mekolo Akolaliyo kiwi pewe-kama witikene tukule i i wa ne wene takatapemotoane tekene ni kowitikoane uku. <sup>7</sup> Ete-kitike wene mekoa meke tokomo yatekouya tekene wene weye akeneya meane ke wane wediane mekene uku. Akolaline ali atoa weye akake tokano, ke wane uku-ye.

## *Onisimasi Neke Yapu Wa Moa Mekamene Wa*

### *Poloyo Pailimone Kowitanemo*

<sup>8</sup> Keraisu patu kautakoane kakene neke padele toatekole wete ta wane tika tika toane tamele tokoyake edikoane wamadene waku. <sup>9</sup> Neeke wene mekoane mekene tekene ko akatekoane uku. Nipa no Polo ada toanemeku ago Keraisu Yesunole takakouke po yapu pitikene anu oyago Pailimone eya tamene wane ne kowitoane uku-ye. <sup>10</sup> Onisimasiyo nepala poanele tokake po letu mekakana ke wamene. Anu mana tetepo takoane meku agoke uku. No po yapu yonoke po kakaneya pitikene Yesunomo oane metekolu einagome yakoa motoka tokolo ni uku. <sup>11</sup> Papete einagome nekele takakilepa pale tokala taneya. Opi pade nitamokome nekele wedoane takou wa wene pikome anukule-kitika wedoa takoa meko.

<sup>12</sup> Nitikago ne Pailimone mekota wakapea pa wane wetekakilepa anu kolotini ago eni wetekaku-ye. <sup>13</sup> Nipa Keraisunole takama yakouke po yapu pitikenepa einago ne luku kakome no auapea memotoadiya wane pikeneke tuku. <sup>14</sup> Nopla opia pa memotadiya wane wene pikene ne yakameneya meamedekolo waku. Neke weneme no auapeadekalepa epetoo. Nitameke no Poloyo ta wa tika tika tokolo tuku waneke weneme toameadekalepa epetamoo.

<sup>15</sup> Onisimasi einagomepa Pailimone ne nateyame tewitikoa pikilepa ne mekota wakapea pome mekome meademeke taneya patu. <sup>16</sup> Ne mekota wini wakapea nome menokalepa neke skueme topo toa moa eegetane ago tetepo

takamoano, neke kolotini agoka tetepo takoa meamene. Einagopa anu kolotini agono, einagoke wene mekoane meku toa moa patukoa wedoa wene mekoa mea makutukoa moamene. Nekele wedoa takoa ni nepala kikutua Keraisunole takama yawa toono, ame wa oa makutukoa moamene.

<sup>17</sup> Neme nopala odene wene piitikoa mea Keraisunole takadekalepa nipa nopa neke oyago wa makutukoa mou toa einagoke wedoa makutukoa moamene wane uku-ye. <sup>18</sup> Einagome nepala padele toa potoko ni nekeke padeya nami kakoa motokanakeya wete ee meamokalepa noanume nami witikadene tuku, amene. <sup>19</sup> Inapa no Polo anu yoname witiku-ye. Noanume nami witikadene tuku-kutu. Nimo ukuyake eya waneka ne wene takakene ku. Ne mea kama poateka ka no Poloyo yametekouna. <sup>20</sup> Nitikounano, Ali Munagonole takake anu wene moano, ipa Keraisuno takaku wa anu wene weye akoano, einago makutukoa moamene.

<sup>21</sup> Ina ukule neme yakoa tikilepa moa patukoa akole toono wene taneya mekene uku. <sup>22</sup> No none piatekuta nodokakapiamene waneka uku. Akolaliyo kini kowitikimo yakoa tokome no ne pa wa wini noaeku ka yameteko patu wane wediane nepiane mekene ni uku-ye.

### *Poloyo Wipitikome Akenemo*

<sup>23</sup> Eya ago Epaperasi Keraisu Yesunole takaneleke nopala odeneka po yapu yapu pitikagome ne Pailimone wete meamene wa oko. Eya ali-mene nopala odeneka Keraisunole

takoa meki ali-mene Make Arisakasi Dimasi Luke  
kimeka ne wete meamene wa iki.

<sup>24</sup> Tone Ali Muno Keraisu Yesuyo kiwi peya  
pewe yopia memotoane kowitikoane uku-ye.

Opa anu agale eni.

**Weneya Totonu Keraisu Yesunomo**  
**The New Testament in the Witu Language (also known**  
**as the Wiru Language) of Papua New Guinea**  
**Nupela Testamen long tokples Witu long Niugini**

copyright © 1990, 1992 Wycliffe Bible Translators, Inc.

Language: Witu (Wiru)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 4 Mar 2023 from source files dated 22 Nov 2019

160088da-6131-52e6-9b0f-c3dc6e8c6abb